



REPUBLIKA E SHQIPËRISË
KËSHILLI I MINISTRAVE

V E N D I M

Nr __348__, datë __29.04.2015__

PËR

**PROCEDURAT E HYRJES/DALJES, VULOSJES SË ARMËVE DHE
REGJISTRIMIT TË SHTETASVE SHQIPTARË E TË HUAJ ME ARMË
TË KATEGORISË “B” DHE “C” NË TERRITORIN E REPUBLIKËS SË
SHQIPËRISË**

Në mbështetje të nenit 100 të Kushtetutës dhe të pikës 7, të nenit 9, të ligjit nr.74/2014, “Për armët”, me propozimin e ministrit të Punëve të Brendshme, Këshilli i Ministrave,

V E N D O S I :

**I. REGJIMI PËR HYRJE/DALJET DHE REGJISTRIMIN E ARMËVE
NË TERRITORIN E REPUBLIKËS SË SHQIPËRISË**

1. Kontrolli, rregullat e hyrje/daljes, dhe regjistrimi i armëve në pikat e kalimit të kufirit shqiptar bëhet nga shërbimi doganor, Autoriteti i Kontrollit Shtetëror të Eksporteve (AKSHE) dhe nga Policia e Shtetit.

2. Për procedurën e hyrje/daljes me armë në pikat e kalimit kufitar, subjektet e licencuara për import/eksport, tregtim apo transport armësh detyrohen t'i paraqesin shërbimit doganor dhe punonjësit të policisë kufitare dokumentet e vlefshme si më poshtë:

- a. Licencën e lëshuar nga Drejtoria e Policisë së Shtetit, “për import/eksport dhe tregtimin të armëve te kategorive “B1”, “B4”, “C” dhe “D”,
- b. Dokumenti i identitetit.

- c. Autorizimin e AKSHE-së për import/eksport të armëve të kategorive “B1”, “B4”, me përjashtim të rasteve të parashikuara në pikën 4 të këtij vendimi.
- d. Dokumentin e blerjes së armëve, pjesëve të armëve, municionit. Armët regjistrohen me numra serial, kalibrin, tipin, fabrikën e prodhimit.

3. Kontrolli fizik dhe dokumentacioni i armëve të subjekteve me licencë që hyjnë në pikat e kalimit bëhet nga punonjësit doganorë, punonjësi i policisë kufitare dhe AKSHE.

4. Për procedurën e hyrje/daljes me armë në pikat e kalimit kufitar për shtetasit shqiptarë, personat e huaj, shqiptarët rezidentë jashtë Shqipërisë, detyrohen t'i paraqesin punonjësit të policisë kufitare një nga dokumentet e vlefshme si më poshtë:

- a. Autorizim për blerje/shitje armë gjahu a koleksioni jashtë vendit;
- b. Autorizim të përkohshëm për gjueti;
- c. Autorizim të përkohshëm për gara të qitjes sportive;
- ç. Autorizim apo dokument të vlefshëm të autoriteteve të huaj që lejohen të hyjnë me armë, sipas përcaktimeve të nenit 40, të ligjit nr.74/2014, “Për armët”

5. Kontrolli fizik dhe regjistrimi i armëve të shtetasve që hyjnë/dalin me autorizim për blerje/shitje sipas shkronjës “a”, të pikës 4, të këtij vendimi, në pikat e kalimit bëhet nga punonjësi i policisë kufitare. Dokumenti i blerjes siglohet nga punonjësi që bën kontrollin dhe regjistrimin.

6. Në rastet kur punonjësi i policisë kufitare gjatë kontrollit gjen armë, pjesë arme dhe municion të cilat, subjekti i licencuar/fizik, nuk i ka në dokumente ose janë armë dhe municion të cilat nuk përfshihen në licencë/autorizim, punonjësi i policisë /doganës duhet të sekuestrojë armën dhe municionin.

7. Punonjësi i policisë kufitare kryen veprimet procedurale penale të nevojshme dhe kur shkelja përbën vepër penale referon rastin në organin kompetent të prokurorisë. Armët e sekuestruara në cilësinë e provës materiale administrohen në përputhje me rregullat e Kodit të Procedurës Penale dhe aktet ligjore e nënligjore në fuqi.

8. Regjistrimi i armëve që hyjnë e dalin në pikat e kalimit kufitar bëhet në “Regjistrin e hyrjes/daljes së armëve në pikën e kalimit kufitar në Republikën e Shqipërisë”, regjistri 1, që i bashkëlidhet këtij vendimi.

Regjistrimi i të dhënave të armëve në regjistër, bëhet nga punonjësi i policisë kufitare sipas dokumentit të blerjes së armëve, të përmendur në shkronjën pikën “ç”, të pikës 2, të këtij vendimi.

Regjistrimi i të dhënave të armëve të zjarrit, gjuetie, sportive, për ekspozitë të shtetasve me autorizime të përkohshme, (si armë që hyjnë përkohësisht) bëhet nga punonjësi i policisë kufitare.

II PROCEDURA E VULOSJES SË ARMËVE

9. Vulosja për import është shenjimi shtesë që aplikohet mbi armët e zjarrit të kategorisë B dhe C, të cilat importohen në Republikën e Shqipërisë. Vulosja është detyrim i subjektit të licencuar për import eksportin e armëve të zjarrit pjesëve dhe municioneve të tyre.

10. Vulosja e armëve të kategorisë B dhe C bëhet për armët e importuara nga të gjitha vendet me destinacion Shqipërinë, pavarësisht shënjitimit që kanë nga vendet e origjinës.

Përfshihen nga kjo procedurë armët e importuara nga vendet e BE-së.

11. Vulosja realizohet nëpërmjet shtypjes me shkronja e numra. Vula e Shqipërisë shënohet “AL” në një rreth me diameter 6 mm. Viti i importimit shënohet jashtë rrethit me madhësi 3mm. Thellësia minimale e brazdës bëhet me të paktën 0,1 mm nëse vendoset në një pjesë metalike, dhe të paktën 0,3 mm nëse realizohet në një pjesë polimer.

12. Çdo vulosje duhet të vendoset në pjesën kryesore të dukshme të armës. Pjesa e vulosur të jetë e pazëvendësueshme në asnjë rrethanë në rast thyerje.

13. Standardet e përcaktuara sipas pikave 11 dhe 12, të këtij vendimi, kontrollohen nga Policia e Shtetit, pas kontrollit lëshohet certifikatë e vulosjes.

14. Armët që hyjnë e dalin tranzit me autorizime të përkohshme nuk vulosen.

15. Procesi i vulosjes kryhet edhe për armët që çaktivizohen. Një proces i tillë bëhet për armët e kategorisë “A”, “B” dhe “C”. Pas procesit teknik të paaftësimit armët shënohen me shkronjën “D”. Vulosja e këtyre armëve bëhet nga subjekte shtetërore të licencuara për prodhim ose riparim armësh.

16. Vulosen edhe armët e kategorisë “A”e “B” të cilat merren për qëllime studimi apo laboratorike nga policia shkencore. Ato shënohen me shkronjat “LB”. Vulosja bëhet njëjloj si ato të pikën 15, të këtij vendimi.

17. Armët e vulosura sipas përcaktimit të këtij vendimi para se të jepen në përdorim kontrollohen nga organi përgjegjës i policisë, duke lëshuar certifikatën e vulosjes.

18. Ngarkohen ministri i Punëve të Brendshme dhe ministri i Mbrojtjes të ndjekin procedurat e nevojshme për zbatimin e këtij vendimi.

Ky vendim hyn në fuqi pas botimit në “Fletoren Zyrtare”.

K R Y E M I N I S T R I

EDI RAMA

Në mungesë dhe me porosi

ZËVËNDËS KRYEMINISTËR

NIKO PELESHI

Ref. Vendim i KM, Nr.348, Dt.Aktit:29.04.2015, Dt.Miratimit:29.04.2015, Flet.Zyrtare Nr.72